



Broj: 01-50-1-766/09
Sarajevo, 14. 10. 2009.

**PREDSTAVNIČKOM DOMU
PARLAMENTARNE SKUPŠTINE BiH**

Na osnovu člana 3. stav (2) Poslovnika Posebne istražne komisije Predstavničkog doma Parlamentarne skupštine BiH, usvojenog na konstitutirajućoj sjednici Komisije, održanoj 8. 7. 2009. godine, Posebna istražna komisija dostavlja sljedeći:

**IZVJEŠTAJ
o nabavci automobila koje je
Generalni sekretarijat Vijeća ministara Bosne i Hercegovine
kupio u periodu od 15. 04. 2008. godine do 15. 04. 2009. godine**

Posebna istražna komisija osnovana je Zaključkom Predstavničkog doma Parlamentarne skupštine BiH, usvojenim na 52. sjednici, održanoj 29. 4. 2009. godine. Posebna istražna komisija osnovana je s ciljem dostavljanja izvještaja Predstavničkom domu o svim automobilima, načinu kupovine, kupoprodajnim cijenama i opravdanosti nabavke automobila koje je Generalni sekretarijat Vijeća ministara Bosne i Hercegovine kupio u periodu od 15. 4. 2008. godine do 15. 4. 2009. godine.

Posebna istražna komisija je na 2. sjednici, održanoj 31. 9. 2009. godine, razmatrala Informaciju Generalnog sekretarijata Vijeća ministara Bosne i Hercegovine o nabavci automobila koje je Generalni sekretarijat Vijeća ministara Bosne i Hercegovine kupio u periodu od 15. 4. 2008. godine do 15. 4. 2009. godine, dostavljenu 24. 7. 2009. godine.

Komisija je nakon rasprave od Generalnog sekretarijata Vijeća ministara Bosne i Hercegovine zatražila dostavljanje sve dodatne dokumentacije o nabavci automobila u navedenom periodu.

Generalni sekretarijat Vijeća ministara Bosne i Hercegovine dostavio je, 11. 9. 2009. godine, Dodatnu informaciju sa svom dokumentacijom, i to:

Plan kapitalnih izdataka, Odluka o nabavci vozila, broj: 06-50-1206/08 od 22. 5. 2008. godine, Rješenje o imenovanju Komisije za javne nabavke broj:13. 3. 2008. godine, Izjavu o povjerljivosti i nepristrasnosti komisije od 14. 3. 2008. godine, Zapisnik o pokretanju otvorenog postupka nabavke od 27. 5. 2008. godine, Obavještenje o nabavci objavljeno u „Službenom glasniku BiH“, broj 44/08, Tendersku dokumentacija broj 06-50-1206/08, Zahtjeve za podizanje tenderske dokumentacije pet dobavljača, Zapisnik sa otvaranje prispjelih ponuda od 1. 7. 2008. godine, Ponudu „Brčko Gas“ d.o.o. od 18. 6. 2008. godine, Ponudu „S –Auto“ d.o.o. od 20. 6. 2008. godine, Ponudu „Transjug“ d.o.o. od 25. 6. 2008. godine, Zapisnik o glasanju s bodovanjem, prema tenderskoj dokumentaciji od 1. 7. 2008. godine, Odluku o dodjeli ugovora najuspješnijem ponuđaču, broj 06-50-1206-4/08 od 2. 7. 2008. godine, Ugovor o kupoprodaji broj: 06-50-1206-6/08 od 28.7. 2008. godine, Mišljenje Pravobranilaštva Bosne i Hercegovine, broj: M-595/08 od 4. 7. 2008. godine, Račun broj 0568/08 od 17. 10. 2008. godine, Radni nalog, broj: 0568/08 od 17. 10. 2008. godine, Povrat sredstava po dopisu od 08. 6. 2009. godine, Izvještaj o provedenom postupku Agenciji za javne nabavke broj 06-50-1206/08 od 25. 9. 2008. godine i Obavještenje o dodjeli ugovora u „Službenom glasniku BiH“, broj 82/08.

Posebna istražna komisija je na 3. sjednici, održanoj 14. 10. 2009. godine, razmatrala Informaciju Generalnog sekretarijata Vijeća ministara Bosne i Hercegovine o kupovini automobila za potrebe Vijeća ministara Bosne i Hercegovine, i Dodatnu informaciju Generalnog sekretarijata Vijeća ministara Bosne i Hercegovine o kupovini automobila za potrebe Vijeća ministara Bosne i Hercegovine.

Iz navedenih informacija Generalnog sekretarijata Vijeća ministara Bosne i Hercegovine proizilazi da je Generalni sekretarijat Vijeća ministara Bosne i Hercegovine u periodu od 15. 4. 2008. godine do 15. 4. 2009. godine kupio jedno vozilo marke „Audi“ tip „Q7“ za potrebe Ureda predsjedavajućeg Vijeća ministara Bosne i Hercegovine, da je cijena automobila sa svom dodatnom opremom iznosila 219.900,00 KM, da je zbog nemogućnosti ugradnje jednog dijela dodatne opreme navedena cijena naknadno smanjena za iznos od 1.934,00 KM, da je navedeni iznos vraćen Generalnom sekretarijatu Vijeća ministara Bosne i Hercegovine, te da je nabavka automobila, predviđena Planom kapitalnih izdataka Generalnog sekretarijata Vijeća ministara Bosne i Hercegovine za 2008.godinu, provedena u skladu sa članom 10.a Zakona o javnim nabavkama, putem otvorenog postupka nabavke.

Nakon rasprave Posebna istražna komisija je:

- jednoglasno prihvatila informacije Generalnog sekretarijata Vijeća ministara Bosne i Hercegovine o nabavci automobila u periodu od 15. 4. 2008. godine do 15. 4. 2009. godine.
- sa četiri glasa „za“ jednim glasom „protiv“ i dva „suzdržana“ glasa, utvrdila da je postupak javne nabavke navedenog automobila bio transparentan i da je proveden u skladu sa odredbama Zakona o javnim nabavkama Bosne i Hercegovine.
- sa tri glasa „za“ dva glasa „protiv“ i dva „suzdržana“ glasa, utvrdila da je kupovina navedenog vozila bila opravdana i u skladu sa Planom kapitalnih izdataka Generalnog sekretarijata Vijeća ministara Bosne i Hercegovine.
- Posebna istražna komisija je jednoglasno odlučila da Predstavničkom domu Parlamentarne skupštine Bosne i Hercegovine predloži donošenje novog zaključaka kojim bi se proširila nadležnost ove posebne istražne komisije ili kojim bi se formirala nova istražna komisija s ciljem da se Predstavničkom domu dostavi izvještaj o nabavci automobila za potrebe svih ministarstava u Vijeću ministara Bosne i Hercegovine, u periodu od 1. 1. 2007. godine do danas.

PRVI ZAMJENIK PREDSJEDAVAJUĆEG
POSEBNE ISTRAŽNE KOMISIJE
Milica Marković

Dostaviti:

- Predstavničkom domu;
- a/a